

Pa cuminsa cu un movecion positivo pa San Nicolas

SNBA ta organizando un summit pa dia 21 di Augustus



ORANJESTAD (AAN)

— Andres Hernandez, miembro di San Nicolas Business Association, a elabora tocante e desaroyonan cu tin den e distrito y entorno un reunion cu lo tuma lugar na Augustus proximo, pa tin mas movecion na San Nicolas. Hernandez a expresa cu pa hopi tempo nan ta scucha tocante diferente plan pa desaroya e distrito cu ya SNBA no ta kere den plan mas.

No obstante tin accionnan positivo cu ta bay tuma lugar, y ya caba danki na

famia de Veer, nan tin nan cinema Principal, habri di nobo.

Y pa e parti pabao di e caya tin plannan hopi concreto y muy pronto lo scucha mas di dje y mira e trabaoan cu lo sosode. E caya principal ta den un situacion critico actualmente, unda tin entre 19 pa 20 comerciante cu no ta bar of banco y tin cinco di nan cu a indica caba, cu pa inicio di otro aña lo no ta habri mas pasobra nan ta cerando caha cu entrada ridiculo. E ta dificil pa nan sobrevivir si no tin entrada. Sr. Hernandez a duna di



conoce cu SNBA a bin cu un plan master, cu ta un summit. Esaki lo tuma lugar dia 21 di Augustus na Santa Teresita Center a porta cera y sin presencia di publico ni prensa.

Nan lo tin presencia si di ministernan, lidernan di fraccionnan di Staten, y di otro instancianan cu por haci un diferencia pa e distrito di San Nicolas. Ademas nan tin tres inversionista di afo, cu a confirma caba, y diferente inversionista local cu tambe lo ta parti di e summit aki.



Nan mester bin cu nan proyecto, su solucion socio-economico, y e proyecto mester cuminsa seis luna despues di e fecha di e summit. E ta muestra algo complica pasobra nan ta pidiendo pa cuminsa den e proximo seis lunanan pero e ta posible, segun sr. Hernandez.

E Asociacion ta spera cierto cambianan. Hernandez a comenta cu el a scucha minister Othmar Oduber bisa cu e presupuesto lo wordo poni den e caya cu ta pendiente for di e gobernacion anterior, y mescos cu a haya Promenade mester haya e caya principal renova.

Entre otro mester haya wifi, señalnan cu no tin suficiente, of no ta existi pa tin un fluho den e caya. A haci un avaluo den un dia completo, y nan a conta entre 800 cu 1000 v-cars cu ta pasando bay den direccion di e beachnan pariba, pero nan no ta pasa riba e Caya pasobra mayoria di nan no sa ni unda esaki ta ni sa con pa drenta pasobra no tin un guia, y riba esey nan ta bezig cune tambe.

Sr. Hernandez a expresa

cu si nan logra sikiera tres inversionista den e seis lunanan fihá, e Asociacion portacento. Sin embargo, e invitacionnan ta wordo entrega personalmente, cu un entrevista, y den esaki nan ta wak kico ta e posibilidadnan y di cada invitado lo sa kico nan ta bay trece dilanti.

Sr. Andres Hernandez a señala cu e preocupacion di tur hende di San Nicolas ta e Hickinson Hotel na final di Caya, pero pa esaki tin un solucion caba. E tin entendi cu henter e familia a bay di acuerdo caba y cu Huez a nombra e persona caba, cu ta bay ta encarga cu esaki caba y cu tin cuater comprado pendiente. E asociacion tin comunicacion cu Hotel Marchena cu tambe tin un promesa di apertura di casino, y cu nan a anuncia cu si e hotel pariba nan ta pone e prome bloki, nan lo sigui cu e renovacion di e hotel, unda nan tin permiso pa 40 camber y tin e posibilidad di casino abao.

Na momento cu wak esaki so, y un caya principal renova, San Nicolas ta bay cambia, sr. Andres Hernandez di SNBA a subraya.